



96 abitaziuns sin ina lunghezza da 200 meters porscha l'abitadi «Quatter stagiuns» dal biro d'architectura Bearth + Deplazes, Cuira, a l'ur da la citad da Cuira.

FOTO MAD

# Abitadis urbans differents e tuttina sumegliants

Actualmain vegnan differents projects premiads cun la Distincziun Architectura dal Grischun exponids en plirs lieus dal Grischun. A Cuira ha l'Uniun Premi d'architectura dal Grischun envidà mesemna a dus referats davart la construcziun da citads contemporanea. E quai cun dus projects distinguids e realisads en la chapitala grischuna.

MARTIN GABRIEL/FMR

Ins po senz'ater dir ch'i saja stada ina dieta specialisada per architects e persunas dal sector da construcziun e per amatur d'architectura. *Christian Auer* da la suprastanza da l'Uniun Premi d'architectura dal Grischun ha beneventà il public e ditg che l'uniun veglia sensibilisar e promover la discussiun davart la construcziun urbana.

## Quatter stagiuns en il quartier dal Rain

Tranter ils schrebertins ed il sgrattanivels da Cuira vest sa chattan en in abitadi 96 abitaziuns sin ina lunghezza da 200 meters. Quest object è vegni distingui da l'Uniun Premi d'architectura dal Grischun. Sco quai che l'architect *Daniel Ladner* dal Biro Bearth e Deplazes da Cuira ha declarà saja la finamira stada da construir in spazi d'abitar cun dimoras simplas che possian vegnir finanziadas. Sutstraitgà ha l'architect il grond spazi da curtin e las lautgas da mintga abitaziun cun vista vers sid e vers nord. Il num «Quatter stagiuns» signifitgescha er la buna qualitad da viver durant tuttas stagiuns da l'onni.

## «Tusculum» da Men Duri Arquint

Gia il num di ch'i sa tracta d'ina pitschna citad en la citad. L'architect engiadinais *Men Duri Arquint* ha preschentà ses project da renum cun otg chasas exclusivas en il quartier da villas da Cuira. La citad da Tusculum en il nord da Roma cun bleras villas e sedias da superritgs haja animà el da sviluppar l'idea da las otg chasas exclusivas sin la spunda sulegliva dal «Böschaguot» sur Cuira siador. I sa tracta da duas gruppas a quatter chasas ch'èn construidas ina vi da l'autra senza, che ina u l'autra da las villas disturba in dals vischins.

## Il punct flavel da l'urbanistica

En ina discussiun al podium manada dal planisader da la citad ed architect *David Canzoni* han ils dus undrads cun la Distincziun d'architectura *David Ladner* e *Men Duri Arquint* discutà davart las schanzas e las sfidas da construir abitadis en moda contemporanea. L'architectura contemporanea na saja betg exnum ina dumonda dal pretsch, mabain surtut da l'incumbensa, da la qualitad dal lieu e da las ideas da l'architect, esi vegni ditg. Er il docent *Christian Auer* ha ditg

a la FMR, ch'el saja stà surstà gia a la surdada dals premis che omdus projects preschentads porschian ina excellenta qualitad da viver. Ils dus architects han appellà a la politica che stuessa a lur avis sa stentar pli fitg cun procurar per la basa legala per realisar abitadis da buna qualitad. Las leschas da bajegiar stuessan conceder dapli libertads. «En Svizra regia il pensar da parcellass. Mintgin construescha sia chasa amez sia parcella e punct.» Cun rumper quella monotonia pudess'ins realisar bels abitadis cun ina buna qualitad da viver.

## Distincziun d'architectura promova la qualitad

La Distincziun d'architectura dal Grischun è vegnida surdada il november 2021 per la sisavla giada. 82 projects eran vegnids inoltrads per la promoziun e per la reconuschientscha. Sis projects – tranter auter igl abitadi «Quatter stagiuns» dal biro d'architectura Bearth + Deplazes a Cuira – en vegni distinguids. Il project Tusculum da *Men Duri Arquint* e set ulteriurs projects han survegni in premi da reconuschientscha.